

四庫全書

史部

欽定四庫全書

宋史卷一百三十七

元中書右丞相總裁托克托等修

樂志第九十

樂十二 樂章六

祭太社太稷

親耕藉田蜡祭

祭風雨雷師
釋奠文宣王

祭先農先蠶
武成王

祭祚德廟

祭司中司命

景德祭社稷三首

降神靜安 百穀蕃滋麗乎下土聿崇明祀垂之千古
育物惟茂粒民斯普報本攸宜國章咸覩

奠玉幣酌獻嘉安 於穆大祀功利相宜靈壇美報歷
代昭然介以蕃祉祚以豐年土爰稼穡允協民天

送神靜安 制幣犧齊正辭無愧樂以送之畢其精意
景祐祀社稷三首

迎神靈安 五紀之本百貨何極道著開闢惠周動植
國崇美穀民資力穡奠獻惟寅神靈來格

初獻升降正安 太社后土太稷后稷奠玉幣並嘉安

奉俎豐安

同前

亞終獻文安送神寧安 神之來兮降茲下土神之去兮杳無處所壇壝肅然瘞幣徹俎乃粒之功冠于萬

古

奉俎豐安

神州地祇皇地祇與社稷通用

禮崇明禋惟馨斯酒潔粢

豐盛殺時禘牲齊莊嚴祇升燎于禋其報伊何如山

如阜

大觀祀社稷九首

迎神寧安黃鍾二奏 惟土之尊民食資焉陰祀昭格

牲牢腥羶有功于民告其吉蠲神之來享雲車翩翩

太簇角二奏 惟穀之神函育無窮百嘉蕃殖民依厥

功嚴飭壇壝儀肅雍神之來享祈于登豐

姑洗徵二奏 猗歟那歟生養斯民家給人足時底熙

純祗嚴明禋於薦苾芳粢盛豐潔神乃有聞

南呂羽二奏 邊豆斯陳三牲告幽報本之禮答神之

休來歆芬香豐登於秋倉箱千萬治符成周

初獻升降正安 崇崇廣壇嚴恭祀事威儀孔時周旋

進止鏘若環珮誠通于幽相于農植邦其咸休

奠幣嘉安 於嘻陰祀封土惟崇于時之吉歆予鼓鍾

柔靜化光人賴其功陳茲量幣百貨是隆

酌獻嘉安 坤元生物功利相宣蠲茲祀事美報致虔

清酌芬如靈壇巋然酌尊奠觴神其格焉

亞終獻文安 薦嘉亶時洋洋來格載登茲壇齊明維

敕神用居歆順成農穡其崇若墉其比如櫛

送神寧安 尊壘芬香威儀肅雍靈心嘉止洋洋交通
神歸降禧年斯屢豐倉箱千萬慰予三農

紹興祀太社太稷十七首

迎神用寧安函鍾為宮 春社用 五祀之本社稷有嚴艾

作伊始夫敢不虔吉日惟戊式薦豆籩神其來格用
介有年

函鍾為宮

秋社
臘用

功烈在民誕受露兩良耜既歌乃揚

帔舞是奉是尊厚禮斯舉相其豐年多稔多黍

太簇為角 是尊是奉茲率舊章樂音純繹薦溢圓方
情文備矣神其迪嘗永觀錫羨多穡穰穰

姑洗為徵 穀資土養民賴穀生功利之博莫之與京
式嚴祀壇因物薦誠禮具樂奏惟神顧歆

南呂為羽 國主社稷時祀有常肅若舊典報本不忘
粢盛豐潔歌吟青黃尊神倏來百物賓將

盥洗正安 祭重齊肅神格專精沃洗于阼涓潔著誠

清明鬯矣熙事備成以似以續如坻如京

升壇正安 神地之道粒食有先歲謹祈報禮嚴豆邊

降登裸薦罔或不虔以似以續宜屢豐年

大社位奠玉幣嘉安

春秋太社土
正后稷通用

土發而祭農祥是

祈邊豆加籩典禮有彛惟茲珪幣用告肅祗神靈降

鑒錫我繁釐

太社位奠玉幣嘉安

秋臘大社土
正后稷通用

赫赫媪神稼穡是

司方是藉斂報本攸宜嘉壇建祀玉帛陳儀明靈昭

格以介蕃釐

還位正安 國主大社地道聿神稷司百穀利毓惟均
練日新吉粢盛苾芬神燕娛矣福此下民

捧俎豐安 嘉承天和黍稷翼翼默相農功繄神之德
俎實犧牲舊章是式嗣有豐年我庾維億

大社位酌獻嘉安

春社大稷土
正后稷通用

封土崇祀有烈在民

千載不昧福此人羣洗爵奠筭有酒其芬神具醉止
禮樂欣欣

大社位酌獻嘉安

秋稷臘大社土
正后稷通用

叶氣嘉生年穀順

成萬億及秭如坻如京奉時犉牡告於神明歌此良

耜於昭德馨

亞終獻文安 風雨時若自天降康稼穡滋殖自神發

祥穀我婦子豐年穰穰報本嚴祀齊明允臧

徹豆娛安 報本之禮載于甲令靈壇昭告神既來聽

徹彼豆籩精誠斯罄實惟豐年農夫之慶

送神寧安 乃粒烝民功昭萬古國有常祀薦獻式叙

肅肅雍雍舊章咸舉神保聿歸介我稷黍

望瘞正安 地載萬物民資迺功報本稱祀太稷攸同

禮樂既備訖埋愈恭神其降嘏時和歲豐

熙寧祭風師五首

迎神欣安 飄颻而來淅瀝而下爰張其旂爰整其駕

有豆有登有兆有壇弭旌柅輶降止且安

升降欽安 盥悅于下有盤有匱饋酌于上有登有彝

服容柔止進退優止即事寅恭神其休止

奠幣容安 育我嘉生神惠是仰載致斯幣庶幾用享
鼓之舞之式繁爾神錫福無疆佑此下民

亞終獻雍安 栗栗壇坫載是豆觴醇烈氤氳普薦芬
芳酌之維宜獻之維時民有報侑靈用安之

送神欣安 奠獻紛紛靈心欣欣超然而返衆御如雲
其施伊何多忝多稔其祥伊何不愆厥叙

大觀祭風師六首

降神欣安 羽旗雲車飄颻自天猗歟南箕欣喜升煙

牲饌粢盛俎簋鉶籩維神戾止從空泠然

初獻升降欽安 明昭維馨威儀孔時鏘鏘鳴佩欽薦

牲犧惟恭惟祗無愆無違周旋中禮肅恭委蛇

奠幣容安 吹噓于喁披拂氤氲衆竅咸作潛運化鈞

恩大功豐酬神惟恭嘉贈盈箱于物有容

酌獻雍安 犧尊斯陳清醑盈中芬芬苾苾馨香交通

明靈來思歆我精衷惟千萬祀品物芘芘

亞終獻雍安 清醑洋洋虔恭注茲條鬯敷宣神用歆

之尊壘靜嘉金奏諧熙於皇肆祀休我羣黎

送神欣安 窈冥無窮盼嚮斯融來終嘉薦歸返遙空
惟神之歸欣安導和惟神之澤于彼滂沱

兩師五首

迎神欣安 神之無象亦可思索維雲陰陰維風莫莫
降止壇宇來顧芳馨侑以鼓歌薦此明誠

升降欽安 珮玉璆如黼黻襟如承神不懈訖獲嘉虞
聖皇命祀臣敢弗恭凡爾在位翼翼雍雍

奠幣容安 崇崇壇堦靈既降止有嚴執奠承祀茲始
明靈在天式顧庶察澤潤以時永拂荒札

酌獻亞終獻雍安 寅恭我神惟上之使俾成康年民
俛休祉折俎既登酌酒既盈匪薦是專配以明誠

送神欣安 牲俎告徹嘉樂休成卒事有嚴燕虞高靈
蕃我民人育我稷黍萬有千祀承神之祐

紹興祭風師六首

迎神欣安 夫物絪縕神氣撓之誰歟其司維南之箕

俶哉明庶我祀維時我心孔勞神其下來

初獻升降盥洗欽安 神哉沛矣厥靈載揚揚靈如何

剡剡皇皇我其承之繩繩齊莊往從鬱人爰挾斯芳

奠幣容安 物之流形甚畏瘡癘八風平矣嘉生以遂

綵縷之積有量斯幣惟奉之報匪物之貴

酌獻雍安 我求於神無臭無聲神之燕享惟時專精

大磬在列禋燎在庭侑我桂酒娛其以聽

亞終獻 禮有三祀儀物視帝神臨消搖疇敢跛倚重

觴載申百味孔旨神兮樂康答我以祉

送神

曲同
迎神

荃其止乎裊裊其容奄橫四海蹇莫之窮

時不驟得禮焉有終荃其行乎余心慙慙

兩師雷神七首

迎神欣安 衆萬之託動之潤之昭格孔時維神之依
洽然後先肆我肯顧是耶非耶紛其來下

初獻盥洗升降欽安 言言祠宮爰考我禮維西有壘

維東有洗爰潔爰滌載薦其醴神在何斯匪遠具邇

奠幣容安 霈兮隱兮蹶其陰威相我有終胡寧不知
我幣有陳我卽斯珪豈惟有陳于以奠之

兩師位酌獻雍安 山川出雲裔裔而縷載靈載濛其

德迺溥自古有年胡然莫祖無簡我觴無怠我俎

雷神位酌獻

曲同
兩師

瞻彼南山有虺其出維蟄之奮維

癘之息眷焉顧饗在夏之日觴豆匪報皇忍忘德

亞終獻

曲同
初獻

作解之德形聲一兮爰展獻侑酌則三

兮我興有假云胡有私下土是冒庶其遠而

送神

曲同
迎神

陰旄載旋鼓車其鞭問神安歸冥然而天

皇有正命祀事孔蠲其臨其歸億萬斯年

雍熙享先農六首

餘同
祈穀

降神靜安先農播種九穀務滋靈壇致享良耜陳儀

吉日惟亥運屬純熙樂之作矣神其格思

奠玉幣敷安親耕展祀明靈來格九有駿奔百司庀

職獻奠肅肅登降翼翼祈彼豐穰福流萬國

奉俎豐安肅陳韶舞祗薦犧牲乃逆黃道以率躬耕

亞獻正安 祀惟古典食乃民天歆茲潔祀以應祈年

終獻正安 式陳芳薦爰致虔誠神其降鑒永福黎甿

送神靜安 明禋紺壇靈風肅然登歌已闋神馭將旋

道光帝籍禮備公田鑒茲躬稼永錫豐年

明道親享先農十首

迎神靜安 稼政之本民食惟天甫田兆歲后稷其先

靈壇既祀黛耜攸虔乃聖能享億萬斯年

皇帝升降隆安 冕服在御壇壝有儀陟降左右天惟

顯思

奠玉幣嘉安 將躬黛耜先陟靈壇嘉玉量幣樂舉禮

殫神既至止福亦和安千斯積詠萬國多歡

奉俎豐安 將迎景福乃薦嘉牲藉于千畝用此精誠

皇帝初獻禧安 雲壘已實玉爵有舟薦于靈籍佇乃

神休

飲福禧安 神既至享福亦來酬申錫純嘏旨酒維柔

思文后稷貽我來牟子孫千億丕荷天休

退文舞進武舞正安 羽葆有奕文武交相周旋合度

福祿無疆

亞獻正安 豆籩雖薦黍稷非馨惠我豐歲歆茲至誠
終獻正安 歆我嘉薦錫我蕃禧多黍多稌如京如坻
送神靜安 獻終豆徹禮備樂成祠容肅肅風馭冥冥
三時務本一墾躬耕人祇胥悅祉福是膺

景祐享先農五首

迎神凝安 在昔神農首茲播殖無有污萊盡為稼穡

乃粒斯民實惟帝力嘉薦令芳佇瞻來格

升降同安 居德之厚厥祀攸陳土膏初脉農事先春

鏗然金奏儼若萃紳陟降于阼福祿惟神

奠幣明安 農為政本食乃民天苾芬明祀薦藜良田

陳茲量幣望彼豐年茂介福祉來欽吉蠲

酌獻成安 農祥晨正平秩東作倬彼大田序乃錢鏹

酒醴盈尊金瓊合樂期茲萬年克于六幕

送神凝安 務穡之本恤祀惟馨神斯至止降福攸寧

崇茲稼政合于禮經俎徹樂闋邈仰迴靈

先蠶六首

迎神明安 生民之朔衣皮而羣惟聖有作被冒以文

禮樂以成貴賤以分欲報之德金石諧均

升降翊安 掩抑笙簫鏗鎡金石神來燕娛嘉我休德

奉祀之臣洗心翊翊錫茲福禧以惠四國

奠幣娛安 皇天降物屢化若神聖實先識躬以教民

功被天下為萬世文幣以達志庶幾徹聞

酌獻美安 夙哉聖神成功微妙迺袞迺裳以供郊廟
百末旨酒嘉觴自炤靈來燕饗音不嘯以笑

亞終獻惠安 神之徠駕蹒蹒紫壇熙燭夜光會竿瑟
鳴球琅薦旨酒雜蘭芳佑明德賜百祥

送神祥安 神之功兮四海所宗占五帝兮莫與比崇
倏往來兮旌旗容容恭明祀兮萬世無窮

紹興享先農十一首

皇帝入內壇盥洗降安 大事在祀齊潔為先既盥而

升奉以周旋下觀而化無敢不蠲惟神降格鑒厥精虔

迎神靜安 猗與田祖粒食之宗世世仰德青壇載崇
時惟后稷躬稼同功作配並祀以詔無窮

神農后稷位奠幣嘉安 制為量幣厚意是將求之以
類各因其方于以奠之精誠允彰神其享止惠我無
疆

尚書奉俎豐安 柔毛剛鬣或剝或烹為俎孔碩登薦

厥誠

酌獻禧安 蠲滌醴竿巾帨而升挹彼注茲酒醴維清
洋洋在上享于克誠神其孚佑以厚民生

文舞退武舞進正安 羽毛干戚張弛則殊進旅退旅
匪棘匪舒

亞獻正安 顯相祀事濟濟鏘鏘舉竿酌醴神其允臧
終獻正安 穀核維旅酒醴維馨于再于三禮則有成
飲福禧安 幽明位異施報理同克恭明神降福乃豐

我膺受之來燕來崇豈伊專享于彼三農

徹豆歆安 莫重於祭非禮不成邊豆有踐爾穀既馨

神具醉止薦以齊明贊徹孔時釐事斯成

送神靜安 神之來止風馭雲翔神之旋歸有迎有將
歌以送之磬筦鏘鏘何以惠民豐年穰穰

親耕藉田七首

皇帝出大次乾安 勤勞稼穡必躬必親為藉千畝以
教導民帝出乎震時惟上春天顏咫尺望之如雲

親耕 元辰既擇禮備樂成洪縻在手祇飾專精三推
一墪端冕朱紘靡辭染屨以示黎甞

升壇 方壇屹立陞級而登玉色下照臨觀耦耕萬目
咸覩如日之升成規成矩百祿是膺

公卿耕藉 羣公顯相奉事齋莊率時農夫舉耜載揚
播厥百穀以佑我皇多黍多稌丕應農祥

郡官耕藉 畟畟良耜我田既臧土膏其動春日載揚
執事有恪于此中邦農夫之慶棲畝餘糧

降壇 肇新帝藉率我農人三推終畝祇事咸均陟降
孔時粲然有文受天之祐多稼如雲

歸大次 教民稼穡不令而行進退有度琚瑤鏘鳴言
還煩幄禮則告成帝命率育明德惟馨

紹興祀先農攝事七首

迎神凝安 青陽開動土膏脉起日練吉亥為農祈社
典秩增峻儀物具美幄光煩黃庶幾戾止

初獻升殿同安

盥洗同

率職咸泣禮容睟然澡身端意

陟降靡愆神心嘉虞享茲潔蠲敷錫純佑屢登豐年
奠幣明安 靈旂載臨見光陳贄有嚴篚實式將純意
盼嚮既接禮行有次神兮安留歆我禋祀

神農位酌獻成安 耒耜之教帝寔開先致養垂利古
今民天嘉薦報本于以祈年誠格和應神娛福延

后稷位酌獻成安 有周應歷實起后稷相時神功率
由稼穡振古稱祀先農並食阜我昌我時萬時億

亞終獻同安 旨具百味酌備三疇貳觴既畢禮洽意

周庶幾嘉享格神之幽相我稽事錫以有秋

送神凝安 熙事成兮始終潔齊籩豆徹兮搏節靡垂

靈有嘉兮降福孔皆飄然逝兮我心孔懷

祀先蠶六首

迎神明安 功被寰宇儻蟲之靈有神司之以生以成

典禮有初祀事講明孔蓋翠旌降集于庭

初獻盥洗升殿翊安

降同

靈脩戾止詔以毛血既盥而

悅尊爵蠲潔金石諧宛登降有節宜顧宜享情文不

越

奠幣娛安 化日初長時當暮春蠶事方興惟后惟嬪

綵纒御冬殘生濟人敢忘報本篚幣是陳

酌獻美安 盛服承祀出自公桑衣不羽皮利及萬方
百味旨酒有飴其香神其歆止洋洋在傍

亞終獻惠安 日吉辰良禮備樂作精誠內孚俎豆交
錯升歌清越侑此三爵黎民不寒幽顯同樂

送神祥安 神之來矣靈風肅然云胡不留歸旒有翩

乃舉舊典歲以告虔降福我邦於萬斯年

景德蜡祭百神三首

降神高安 百物蕃阜四方順成通其八蜡合乃嘉平
旨酒斯醇大庖孔盈萬靈來格威儀以成

奠玉幣酌獻嘉安 肅肅靈壇昭昭上天潔粢豐盛以
享以虔百神咸萃六樂斯縣介茲景福期於百年

送神高安 來顧來享禮成樂備靈馭翩翩雲行雨施
熙寧蜡祭十三首

東西郊降神熙安 天錫康年四方順成乃通蜡祭索

享于明金石四作羽旄翠旌神來燕娛澤被羣生

升降肅安 惟蜡有祭報神之功合聚萬物來享來宗

承詔攝事不忘肅雍靈之格思福祿來崇

奠幣欽安 穰穰豐年繫侯休德帥承天和欽象古則

嘉玉量幣奠容翼翼靈施暨民罔有終極

奉俎承安 禮崇明祀必先成民奉牲以告備膾其均

炮炙芬芬俎豆莘莘錫之純嘏以佑斯人

酌獻懌安 秩秩禮文為壇四方嘉粟旨酒百神迪嘗
敷與萬物既阜既昌伊樂厥福傳世無疆

亞終獻慶安 禮文備矣肅肅無譁金石諧節圭璧光
華粲以告豐禮以告嘉錫茲福祉以澤幽遐

送神宣安 靈之來下擴景乘光靈之迴御景龍以驤
鑒我休德降嘏產祥大田多稼以惠無疆

南北方迎神簡安 美若休德民和歲豐稼穡雲施其
積如墉惠我四國先嗇之功祭之百種來享來宗

升降穆安 皇皇靈德經緯萬方承詔攝事陟降以莊
高冠岌我長佩鏘洋嘉承神貺令聞不忘

奠幣嘉安 於穆明祀莫如報功靈之利澤惠我無窮
齋以滌志幣以達衷撫寧四極永錫登豐

酌獻禔安 英英禮文既備而全嚴嚴四郊屹屹紫壇
百末旨酒其馨若蘭何以畀民既壽而安

亞終獻曼安 林林生民含哺而嬉教之稼穡實神之
為圖報厚德萬祀無期以假以享錫我繁禧

送神成安 嘉薦芳美靈來宴娛旂車結雲若風馬馳
既至而喜錫我蕃禧嘉承天貺曼壽無期

大觀蜡祭二首

東郊亞終獻慶安 震乘春陽仁司生殖錫我歲豐襄
我民力誰其尸之宗子先嗇億萬斯年懷神罔極

南郊升降穆安 穆如薰風敷舒文藻氣蒸消除豐于
黍稻神之聽之鐘鼓咸考於萬斯年惟皇之報

紹興以後蜡祭四十二首

東方百神降神熙安園鍾為宮
玄冥凌厲歲聿其周
天地閉藏農且息休古為蜡禮伊耆肇脩爰薦飴香
以迓飈旂

黃鍾為角 惟大明尊實首三辰功赫庶物光被廣輪
歲方索享咸秩羣神靈旂來下尸此明禋

太簇為徵 三時不害四方順成酬功報始以我齊明
幽頌土鼓樂此嘉平降祥幅員惠于函生

姑洗為羽 日昱乎晝容光必照盼蠻之交惟人所名

有監在下視茲升燎肅若其承雲駢星曜

初獻升降肅安 禮儀告具必儼容莊工歌屢奏聲和
義章崇壇陟降濟濟蹌蹌靈光共仰嘉薦芬芳

大明位奠玉幣欽安 晨曦未融天宇澄穆有虔秉誠
將以幣玉如在左右罔不祗肅神兮安留錫以祉福

帝神農氏位奠幣

曲同大明

農為政本食乃民天神農氏

作民始力田先嗇之配禮報則然有幣將之維以告

虔

后稷氏位奠幣

曲同
大明

播種之功時惟后稷推以配天

莫匪爾極崇侑清祀是為司嗇陳幣莫將永祚王國

奉俎承安

享以精禋馨非稷黍工祝致告孔碩為俎

執事駿奔繩繩具舉神之嘉虞介福是與

大明位酌獻擇安 肇禋備祀教民美報時和歲豐奉

醴以告惟照臨功等於載燾酌獻云初明神所勞

神農位酌獻

曲同
大明

惟酒欣欣惟神冥冥是顧是享來

燕來寧耒耜之利神所肇興萬世永賴無斁其承

后稷位酌獻

曲同大明

釋之蒸之為酒為醴推本所由於

焉洽禮周邦開基邵家是啓獻茲嘉觴拜下首稽

亞終獻慶安 申以貳觴百味且旨禮告三終神具醉

止旌容騎沓揚光紛委降福穰穰被大豐美

送神宣安 禮樂既成神保聿歸言歸何所地紀天維

豈惟屢豐嗣歲所祈億萬斯年神來燕娛

西方百神降神熙安園鍾為宮 玄冬肇祀始于伊耆

歲事聿成庸答蕃釐眷言西顧匪神司之歸功爾神

翩其下來

黃鍾為角 魄生自西照望太陽下暨諸神貺施萬方
節適風雨富我困箱恭承嘉祀惟以迪嘗

太簇為徵 神罔小大奠方茲土祭列坊墉禮迨猫虎
有功斯民祀乃其所非稷馨香厥福周溥

姑洗為羽 豐年穰穰美芳職職邊豆方圓其儀孔碩
風馬在御雲車載飭來顧來享維娛休德

初獻升降肅安 盥獻恭莊燎煙芬酷載陟載降禮容

可度欽惟爾神上下肅肅成我稷黍鑒此牲玉

夜明位奠玉幣欽安 穆穆太陰禮嚴姊事璧玉華光

推以哀對十二周天歲乃有終盡我備物莫報元功

神農位奠幣

曲同
夜明

耒耜肇興自神農氏稼穡滋殖為

農者始作配明祀奠以告虔萬世佃漁帝功卓然

后稷位奠安

曲同
夜明

明明周祖惟民之恤播種為教下

民廼粒曾是索饗而匪先公萬物難報阡陌之功

奉俎承安 時和歲登物亡疾癘實俎間膏報神之福

匪神福之曷成且豐肥膾咸有惟神之功

夜明位酌獻擇安 除壇西郊坎其擊鼓百靈至止結

璘作主秬鬯湛淡玉笋觥觶是謂嘉德神其安留

神農位酌獻

曲同
夜明

蕩蕩鴻明稱秩群祀配以昔帝式

重農事潔我圭瓚黃流在中靈其鑒茲盼嚮豐融

后稷位酌獻

曲同
夜明

歲十二月祀有常典登列司嗇言

反其本酌彼泰尊百末蘭生承神嘉虞繫此德馨

亞終獻慶安 歌磬臚騶管蕭激香飈御奄留申以貳

觴相與震澹告靈其醉庶幾聽之成我熙事

送神宣安 禮備樂成澹然將歸其留消搖象輿已轍

偃蹇欲驤羽毛紛委忽乘杳冥遺此福祉

南方百神迎神簡安 維物之精散乎太空維索之饗

合聚而同迺擊土鼓于歲之終格彼幽矣盼蠻其通

初獻盥洗升降穆安 有悅其新有匪其潔言念清祀

弗簡弗褻誠意既交品物斯列是用告虔靡神不說

奠幣吉安 百室機杼衣褐具宜民以卒歲神實惠之

言舉祀典答神之釐有筐斯陳振古如茲

神農位酌獻穆安 肇降生民有不粒食維時神農廼

為先嗇爾耒爾耜云誰之因酌以污尊我思古人

后稷位酌獻穆安 維后之功配天其大祀而稷之萬

世如在黃冠野服駿奔皇皇自古有年神其降康

亞終獻曼安 豐年孔多百禮以洽匪極神歡何以昭

答載酌之酒用申其勤神具醉止與物交欣

送神成安 卒爵樂闋禮儀告備神保聿歸敢以辭致

順成之方其蜡乃通自今以始八方攸同

北方百神迎神簡安 蕩蕩閭決氣清次寥彷彿象輿

麗于穹霄蹇其來下肅然風飄神乎安留於焉消搖

初獻盥洗升降穆安 齊誠揭虔敬恭祀事維儼之容

維潔之器雍雍樂成肅肅禮備神其燕娛錫祉庶類

奠幣吉安

配位同

神宅于幽呦呦沈沈至和塞明考我

德音神聽靜嘉儼乎若臨幣以薦誠敢有弗欽

神農氏位酌獻禋安 先嗇之功神寶稱首以耜以耒

俶載南畝列籍皇墳億世是守何以為報爰潔茲酒
后稷氏位酌獻禋安 煌煌后稷實配于天司穡作稼
民以有年匪神之私歲以醴告酌彼黍尊于德之報
亞終獻曼安 蘭生百末申以貳觴神具醉止爛其容
光遺我豐年萬億及秭俾民驩康以洽百禮
送神成安 靈之來兮蚪龍沓沓下土光景憑陵閭闔
靈之旋兮羽衛委蛇偃蹇高驥遺此蕃釐

景祐祭文宣王廟六首

迎神凝安 大哉至聖文教之宗紀綱王化丕變民風
常祀有秩備物有容神其格思是仰是崇

初獻升降同安 右文興化憲古師今明祀有典吉日

惟丁豐犧在俎雅奏來庭周旋陟降福祉是膺

奠幣明安 一王垂法千古作程有儀可仰無德而名
齊以滌志幣以達誠禮容合度黍稷非馨

酌獻成安 自天生聖垂範百王恪恭明祀陟降上庠
酌彼醇旨薦此令芳三獻成禮率由舊章

飲福綏安 犧象在前豆籩在列以享以薦既芬既潔
禮成樂備人和神悅祭則受福率遵無越

充國公配位酌獻成安

哲宗朝增
此一曲

無疆之祀配侑可

宗事舉以類與享其從嘉粟旨酒登薦惟恭降此遐
福令儀肅雍

送神疑安 肅肅庠序祀事惟明大哉宣父將聖多能
歆馨盼饗迴馭凌兢祭容斯畢百福是膺

大觀三年釋奠六首

迎神凝安 仰之彌高鑽之彌堅於昭斯文被于萬年
峩峩膠庠神其來止思報無窮敢忘于始

升降同安 生民以來道莫與京溫良恭儉惟神惟明
我潔尊壘陳茲芹藻言升言旋式崇斯教

奠幣明安 於論鼓鍾于茲西雍粢盛肥碩有顯其容
其容洋洋咸瞻像設幣以達誠歆我明潔

酌獻成安 道德淵源斯文之宗功名糠粃素王之風
碩兮斯牲芬兮斯酒綏我無疆與天為久

配位酌獻成安 儼然冠纓崇然朝庭百王承祀涓辰
惟丁于牲于醑其從予享與聖為徒其德不爽

送神凝安 肅莊紳綏吉蠲牲犧於皇明祀薦登惟時
神之來兮盼蠻之隨神之去兮休嘉之貽

大晟府擬撰釋奠十四首

迎神凝安黃鍾為宮 大哉宣聖道德尊崇維持王化
斯民是宗典祀有常精純並隆神其來格於昭盛容
大呂為角 生而知之有教無私成均之祀威儀孔時

維茲初丁潔我盛筵永適其道萬世之師

太簇為徵 巍巍堂堂其道如天清明之象應物而然
時維上丁備物薦誠維新禮典樂諧中聲

應鍾為羽 聖王生知闡迺儒規詩書文教萬世昭垂
良日惟丁靈承不爽揭此精虔神其來享

初獻盥洗同安 右文興化憲古師今明祀有典吉日
惟丁豐犧在俎雅奏在庭周旋陟降福祉是膺

升殿同安 誕興斯文經天緯地功加于民寔千萬世

笙鏞和鳴粢盛豐備肅肅降登歆茲秩祀

奠幣明安 自生民來誰底其盛惟王神明度越前聖
粢幣具成禮容斯稱黍稷非馨惟神之聽

奉俎豐安 道同乎天人倫之至有饗無窮其興萬世
既潔斯牲粢明醑旨不懈以忱神之來暨

文宣王位酌獻成安 大哉聖王實天生德作樂以崇
時祀無斁清酤惟馨嘉牲孔碩薦羞神明庶幾昭格
充國公位酌獻成安 庶幾屢空淵源深矣亞聖宣猷

百世宜祀吉蠲斯辰昭陳尊簋旨酒欣欣神其來止
鄒國公位酌獻成安道之由興於皇宣聖惟公之傳
人知趨正與享在堂情文寔稱萬年承休假哉天命
亞終獻用文安百王宗師生民物軌瞻之洋洋神其
寧止酌彼金罍惟清且旨登獻惟三於噫成禮

徹豆娛安犧象在前豆邊在列以饗以薦既芬既潔
禮成樂備人和神悅祭則受福率遵無越

送神凝安有嚴學宮四方來宗恪恭祀事威儀雍雍

歆茲惟馨飀馭旋復明禋斯畢咸膺百福

景祐釋奠武成王六首

迎神凝安 維師尚父賜履分封靈神峻密祀事寅恭
蕭鄉祇薦飀馭排空如幾如式福祿來崇

太尉升降同安 上公攝事袞服斯皇禮容濟濟佩響
鏘鏘靈苾惚恍嘉薦令芳神具醉止降福穰穰

奠幣明安 四嶽之裔涼彼武王發揚蹈厲周室用昌
追封廟食簡冊增芳升幣以奠磬筦鏘鏘

酌獻成安 獵渭之陽理冥嘉應非龍非虎聿求元聖
平易近民五月報政祀典之崇於斯為盛

飲福綏安 神機經武隆周之寓表海分封邁燕超魯
耽耽廟貌俎豆有序薦福邦家維師尚父

送神迎安 聖朝稽古崇茲武經禮交樂舉于神之庭
嘉粟旨酒既饗芳馨永嚴列象劒舄簪纓

熙寧祀武成王一首

初獻升降同安 武德泱泱日靖四方百王所祀休有

烈光命官攝事佩玉鏘鏘思皇多祐以惠無疆

大觀祀武成王一首

酌獻成安涼彼周王君臣相遇終謀其成諸侯來許

洋洋神靈尊載酒醑新聲為侑笙簫備舉

紹興釋奠武成王七首

迎神凝安姑洗為宮於赫烈武光昭古今載嚴祀事

敕備惟欽既潔其牲既諧其音神之格思來顧來歆

初獻升殿同安肅肅廟中有嚴階城匪棘匪徐進退

可則冕服是儀環珮有節神之鑒觀率履不越

奠幣明安 祀率舊典禮崇駿功齊明表正盼饗豐融
量幣肅備周旋鞠躬神其昭受幽贊無窮

正位酌獻成安 赫赫尚父時維鷹揚神潛韜略襟抱
帝王談笑致主竹帛流芳國有嚴祀載稽典常

留侯位酌獻 眷彼留侯奇籌贊漢依乘風雲勒成功
旦克配明裡儀刑有煥英氣如生來格來衍

亞終獻正安 道助文德言為世師功名不泯祀事無

遺旨酒惟馨具醉在茲有嘉累獻神其燕娛

送神 日惟上戊神顧精純禮備三獻樂成七均奄留
洋洋流福無垠言還恍惚空想如存

紹興祀祚德廟八首

迎神凝安姑洗為宮 匿孤立後惟義惟忠昔者神考

追錄乃功祀典載加進爵錫公神兮降格尚鑒褒崇
初獻升降同安 廟宇更新輪奐豐敞神靈如在英姿
颯爽執事進趨降升俯仰威儀翼翼虔祈歆饗

奠幣明安 牲薦碩大幣致精純聿升祀事茲用兼陳
箱篚既實奠獻惟寅饗我至意福祿來成

疆濟公位酌獻成安 以身託孤實惟死友撫嫗長之

若父若母潛授于韓克興厥後崇朝以獻德施報厚
英略公位酌獻成安 立孤固難死亦匪易義輕一身

開先趙嗣肅穆廟貌烈有餘氣式旋嘉薦昭哉祀事
啓佑公位酌獻成安 於皇時宋永祚有基始繫覆護
扶而立之敢忘昭答牲分酒醴靈其燕饗益相本支

亞終獻用正安 吻吻靈宇神安且翔三哲鼎峙中薦

嘉觴凜若義氣千載彌光猗其祐之錫羨無疆

送神疑安 禮樂云備畢觴爾神翊翊音送轎輿若聞

駕言歸兮靈旂結雲祚我千億介福來臻

司中司命五首

迎神欣安 冠我我兮服章蕤蕤靈來下兮進止委蛇

我涓我壇我潔我俎降輿卻旌於茲享御

升降欽安 紳綏舒舒佩環鏗鏗陟降上下壇燎光明

有盥于罍有悅于巾不吳不敖庶以安神

奠幣容安 我誠既潔我豆既豐神來降期有儼其容

薦此嘉幣肅肅雍雍何以侑之於樂鼓鍾

酌獻雍安 酌茲旨酒既盈且芬式用來歆衍衍熏熏

何以寧神薦有嘉籩何以錫民曰惟豐年

送神欣安 雲兮飄飄風兮稜稜颺馭反空杲日來昇

歸旆揚揚衆樂鏘鏘我神式懽惠我嘉祥

五龍六首

迎神禧安

神之智兮躍漢潛幽欲豢擾兮無董與劉

陳金石兮佐侑牢羞庶燕享兮澤應民求

升降雅安

靈之至今逸駕騰驤噓雲吸氣承祀日光

展詩鳴律肅莊琳琅何以膺神貺惠無疆

奠幣文安

維靈德兮變化不常沛天澤兮周流八荒

奠嘉幣兮肅雍不忘永佑民兮錫以豐穰

酌獻愷安

練吉日兮進神之堂牲既陳兮粢盛既香

奠桂酒兮容與嘉觴靈安留兮錫我福祥

亞終獻嘉安 明明天子禮文咸秩矧神之功橫被九
域雲施稱民物產滋殖嘉承惠和罔有終極

送神登安 靈之來下以雨先驅靈之旋馭五雲結車
操環應夏發匣端虞真人在御來獻珍符

宋史卷一百三十七

欽定四庫全書

宋史卷一百三十八

元中書右丞相總裁托克托等修

樂志第九十一

樂十三 樂章七

朝會

御樓

肆赦

恭上皇帝皇太后尊號上

建隆乾德朝會樂章二十八首

皇帝升坐隆安 天臨有赫上法乾元鏗鏘六樂儼恪

千官皇儀允肅五坐居尊文明在御禮備誠存

公卿入門正安 堯天協紀舜日揚光淑慎爾止率由

舊章佩環濟濟金石鏘鏘威儀炳煥至德昭彰

上壽禧安 乾健為君坤柔為臣惟其臣子克奉君親

永御皇極以綏兆民稱觴獻壽山岳嶙峋

舜韶更奏堯酒浮觴皇情載懌洪算無疆基隆郊鄩

德茂陶唐山巍日煥地久天長

皇帝舉酒第一盞用白龜 聖德昭宣神龜出焉載白

其色或游于川名符在治瑞應巢蓮登歌丹陛紀異

靈篇

第二盞甘露 天德冥應仁澤載濡其甘如醴其凝如珠雲表潛結顥英允敷降于竹栢永昭瑞圖

第三盞紫芝 煌煌茂英不根而生蒲茸奪色銅池著名晨敷表異三秀分榮書于瑞典光我文明

第四盞嘉禾 嘉彼合穎致貢升平異標南畝瑞應西成德至于地皇祇效靈和同之象煥發祥經

第五盞玉兔 盛德好生網開三面明視標奇昌辰乃
見育質雪園淪精月殿著於樂章色舍江練

羣臣舉酒正安 戶牖嚴丹宸鶴鸞造紫庭懇祈南岳
壽勢拱北辰星得士於茲盛基邦固以寧誠明一何
至金石與丹青

簪紱若雲屯晨趨闔闔門僦僦羅禹會濟濟奉堯樽
周禮觀明備天儀仰睟溫高卑陳表著同拱帝王尊
待漏造王庭威儀盛莫京紛綸簪組列清越佩環聲

禮飲終三爵韶音畢九成永圖鳧藻樂千載奉升平
羣臣第一盞畢作玄德升聞 治定資神武功成顯睿
文貢輸庭實旅朝會羽儀分偃革千年運垂衣萬乘
君孰知堯舜力明德自升聞

約法皇綱正崇文寶歷昌道人振木鐸農器鑄干將
瑞日含王字卿雲藹帝鄉萬邦成一統鴻祚與天長
六變 宸宸威容盛聲明禮樂宣九州臻禹會萬國戴
堯天貢職輸琛賚皇猷煥簡編舍和均暢茂鴻慶結

非烟

朝會儼威儀司常建九旗舞容分綴兆文物辯威蕤
運格桃林牧祥開洛水龜帝功潛日用化俗自登熙
螭階聊載筆紀瑞軼唐虞丹鳳儀金奏黃龍負寶圖
羣材薪棧樸仁政煦蒲盧蕩蕩巍巍德豚魚信自孚
接聖宅神都方來五達區國賢熙帝載靈命握乾符
至化當純被斯文益誕敷車書今混一聖治奉三無
聖王臨大寶八表湊才賢經緯文天賦剛柔德日宣

建邦隆柱石造物運陶甄共致升平業綿長保億年
神化妙無方巍巍邁百王鶴書搜隱逸龍陛策賢良
拱揖朝羣后賓筵闢四方洪圖基億載淳曜德彌光
第二盞畢天下大定 皇猷敷八表武誼肅三邊蘭綺
韜兵日靈臺偃伯年奉珍皆述職削社盡朝天功德
超前古音徽播管弦

伐叛天威震恢疆帝業多削平倂肅殺涵煦極陽和
蹈厲觀周舞風雲入漢歌功成推大定歸馬偃琯戈

六變 惕厲日乾乾潛蟠或躍淵伐謀參上策受鉞總
中堅田訟歸周日民謠戴舜年風雲自冥感嘉會翼
飛天

壺關方逆命投袂起親征虎旅聊攻伐梟巢遽蕩平
天威清朔漠仁澤被黎氓按節皇輿復洋洋載頌聲
蠢茲淮海帥保據毒藜苗不悟龍興漢猶同犬吠堯
六師方雨施孤壘自冰消千載逢嘉運華夷奉聖朝
上游荆楚要澤國洞庭深自識同文世皆迴拱極心

一戎聊杖鉞九土盡輸金大定功成後薰風入舜琴
席卷定巴邛西遐盡率從岷峨難負阻江漢自朝宗
述職方舟集驅車九折通粲然書國史冠古耀豐功
銳旅慶回旋邊防盡晏然鍵橐方偃武飛將亦韜弦
震曜資平壘文明協麗天泚泚成大業赫奕在青編
淳化中朝會二十三首

上壽和安 四序伊始三陽肇開條風入律玉琯飛灰
望雲肅藹鳴佩斯來稱觴獻壽瞻拱星迴

一陽應候萬國同文天正紀節太史書雲凝旒在御
列叙爰分壽觴斯薦祝慶明君

皇帝初舉酒用祥麟 聖皇御寓仁獸誕彰在郊旅貢

游時呈祥星辰是稟草木無傷紀異信史登歌太常

再舉酒丹鳳 九苞薦瑞戴德膺仁藻翰爰奮靈音載

振非時不見有道則臻降岐匪匹儀舜為隣

三舉酒河清 沔彼涇瀆澄明鑑如清應寶運光涵帝

居同分沈璧徹見游魚聖祚無極神休偉與

四舉酒白龜 稽彼靈物允昭聖皇浮石可躍巢蓮益
光金方正色介族殊祥信書永耀帝德無疆

五舉酒瑞麥 芄芄嘉麥擢秀分歧甘露夕洒惠風晨
吹良農告瑞循吏稱奇歸美英主折而貢之

羣臣初舉酒畢作化成天下 軒昊方同德成康粗比
肩素風惟普暢皇道本無偏陰魄重輪滿陽精五色
圓要荒咸率服卓越聖功全

聖德比陶唐千年祚運昌茂功雖不宰鴻業自無疆

極塞成清謚齊民益阜康文明同日月遐邇仰輝光
六變蕩蕩無私世巍巍至聖君山河分國寶日月耀
人文厭浥凝甘露輪囷吐慶雲正聲兼大雅洋溢應

南薰

鴻範合彝倫調元四序均歲功天吏正御苑物華新
底貢陳方物來賓列遠人奉常呈九奏嘉貺動穹旻
大君隆至化興運契千齡覲禮俄班瑞夷賓盡寶庭
成文調露樂奉聖拱辰星舞佾方更進朝陽上楚萍

禮樂昭王業寰區致太平革車停北狩雲稼屢西成
國有詳延詔鄉聞講誦聲日華融五色遐邇仰文明
亭障戢干戈人心浹太和務農登寶穀獵俊設雲羅
儀鳳書良史祥麟載雅歌嘉辰資宴喜星拱弁莪莪
冠古耀鴻徽深仁及隱微二南江漢詠九奏鳳凰飛
設虞羅鐘律盈庭列舞衣文明資厚德怡懌兆民歸
再舉酒畢威加海內革輅征汾晉隳城比燎毛桓桓
勗軍旅將將御英豪神武誠無敵天威詎可逃王師

宣利澤霈若沃春膏

振萬方明德疾徐咸可觀鏗鏘動金奏蹈厲總朱干
夾進昭威武申嚴警宴安守方推猛士當用鷁為冠
六變 宣謝始觀兵桓桓稱鼓行一戎期大定載績議
徂征善政從師律神功冀武成勛哉勤誓衆王業自
經營

聲教方柔遠甌閩禮可招獻圖連日際歸國象江湖
撫運重熙盛提封萬里遙還同有虞氏文德格三苗

南暨宣皇化東吳奉乃神舞千方耀德執玉自來賓
巢伯朝丹陛韓侯覲紫宸古今歸一揆懷遠道彌新
遺俗續陶唐來蘇侯聖皇布昭湯弔伐恢復漢封疆
金鉞申戡剪朱干示發揚宜哉七德頌千載播洋洋
乃眷嘗西顧偏師暫首征靈旗方直指獷俗自亡精
禹敘終馴致堯封漸化成不須嚴尉候於廓海彌清
干戚有司傳威容著凱旋象成王業盛役輟武功全
兵寢西郊閱書惟北闕縣聖神膺景命卜世萬斯年

景德中朝會一十四首

皇帝升坐隆安 金奏在庭羣后在位天威煌煌嚮明

負宸高拱穆清弁冕端委盛德日新禮容有煒

公卿入門正安 萬邦來同九賓在位奉璋薦紳陟降

庭止文思安安威儀棣棣臣哉隣哉介爾蕃祉

上壽和安 天威煌煌山龍采章庭實旅百上公奉觴

拱揖羣后端委垂裳永錫難老萬壽無疆

皇帝初舉酒祥麟 帝圖會昌二獸效祥雙角共觝示

武不傷四靈為畜玄枵耀芒公族信厚元元阜康

再舉酒丹鳳 矯矯長離振羽來儀和音中律藻翰揚
輝珍符沓至品物攸宜至德玄感受天之祺

三舉酒河清 德水湯湯發源靈長皎鑿澄徹千年效
祥積厚流濕資生阜昌朝宗潤下善利無疆

羣臣舉酒正安 思皇多士靖恭著位鳴玉飛綏鏘鏘
濟濟宴有折俎以示慈惠罔敢不祇福祿來暨

金奏在庭有酒斯旨顛顛印印嚮明負宸湛湛露斯

式宴以喜佩玉藥兮罔不由禮

酒以成禮樂以侑食露湛朝陽星環紫極淑慎爾容
既飽以德進退周旋威儀抑抑

初舉酒畢盛德升聞 八佾具呈萬舞有奕既以象功
又以觀德進旅退旅執籥秉翟至化懷柔遠人來格
閭闔天開羣后在位設業設虞庭燎晰晰斧扆當陽
虎賁夾陛舞之蹈之四隩來暨

再舉酒畢天下大定 武功既成綴兆有翼以節八音

以象七德俟俟蹲蹲朱干玉戚發揚蹈厲其儀不忒
偃伯靈臺功成作樂以昭德容以清戎索萬邦會同
邪匿銷鑠盡善盡美侔彼韶箎

降坐隆安 被袞當陽穆穆皇皇擊石拊石頌聲揚揚
和樂優洽終然允臧禮成而退荷天百祥

大中祥符朝會五首

皇帝舉酒醴泉 感沸檻泉寒流清泚地不愛寶其旨
如醴上善至柔靈休所啓利澤無疆允資岱禮

再舉酒神芝 彼茁者芝茂英煌煌敷秀喬嶽寔繁其
房適符脩貢封巒允臧永言登薦抑惟舊章

三舉酒慶雲 惟帝佑德卿雲發祥紛紛郁郁五色成
章奉日逾麗回風載翔歌薦郊廟播厥無疆

四舉酒靈鶴 玄文申錫嘉祥紹至偉茲胎禽羽族之
異翻翰來儀徘徊嘹唳祚聖儲休聿昭天意

五舉酒瑞木 天生五材木曰曲直維帝順天厚其生
植連理效祥成文表德總萃坤珍永光祕刻

熙寧中朝會六首

皇帝初舉酒慶雲 乾坤順夷皇有嘉德爰施慶雲承

日五色輪囷下乘萬物皆飾惟天祚休長彼無極

再舉酒嘉禾 彼美嘉禾一莖九穗農疇告祥史牒書

瑞擊壤歡歌如京委積留獻春種昭錫善類

三舉酒靈芝 皇仁溥博品物蕃滋慶祚回復秀發神

芝靈華雙舉連葉四施披圖按牒永享純禧

元符大朝會三首

皇帝初舉酒靈芝

嘉瑞降臨應我皇德燐燐神芝不

根而植春秋三秀晝夜一色物播詩歌聲被金石

再舉酒壽星 倬彼星象於昭于天維南有極離丙之

躔既明且大應聖乘乾誕受景福億萬斯年

三舉酒甘露 泫泫零露雲英醴溢和氣凝津流甘委

白飴泛泮林珠聯竹栢天不受道聖功允格

哲宗傳受國寶三首與大朝會兼用

永昌 於穆我王繼序不忘明昭上帝上帝是皇長發

其祥惠我無疆受命于天既壽永昌

神光 惟皇上德伊嘏我王將受厥明載錫之光於昭
于天曄曄煌煌緝熙欽止其永無疆

翔鶴 彼鳴在陰亦白其羽聲聞于天來集斯所勉勉
我王咸遂厥宇播于異物受天多祜

紹興朝會十三首

皇帝升坐乾安 鈞陳肅列金奏充庭顛卬南面如日
之昇垂衣拱手治無能名順履獻歲大安大榮

公卿入門正安

升降同

天子當陽臣工率職流水朝宗

衆星拱極環佩鏘鏘威儀抑抑上下交欣同心同德

上公上壽和安

八音克諧萬舞有奕上公奉觴率茲

百辟聲效呼嵩祝聖人壽億載萬年天長地久

皇帝初舉酒瑞木成文

厚地效珍嘉木紀瑞匪刻匪

雕具文見意三登太平允協聖治詩雅詠歌有光既

醉

再舉酒滄海澄清

百谷王符聖治不揚波效殊祉德

淪淵滄海清應千秋叙五行

三舉酒瑞粟呈祥 至治發聞惟馨香播厥百穀臻穰
穰農夫之慶歲其有禾易長畝盈倉箱時和物阜粟
滋茂嘉生駢穗來呈祥自今以始大豐美行旅不用
齋餼糧

羣臣酒行正安 羣公卿士咸造在庭式燕以衍恩均
露零穆穆明明於斯為盛歸美報上一人有慶

明明天子萬福來同嘉賓式燕曷不肅雍燕以示慈

式禮莫愆樂胥君子容止可觀

酒一行文舞 帝德誕敷銷爍羣慝近悅遠來惟聖時
克玉振金聲治功興起韶箭象之盡善盡美

文物以紀藻色以明禮備樂舉適觀厥成睿知有臨
誕敷文德教兩化風洽此四國

酒載行武舞 用戒不虞誰能去兵師出以律動必有
名折彼遐衝布昭聖武和衆安民時惟多助

止戈曰武惟聖為能御得其道無敢不庭整我六師

稽諸七德不吳不揚有嚴有翼

皇帝降坐乾安 帝坐熒煌廷紳肅穆對揚天休各恭
爾服頌聲洋洋彌文郁郁禮備樂成永膺多福

建隆御樓三首

南郊回仗駕至樓前采茨 高烟升太一明祀達乾坤
天仗回嶢闕皇輿入應門簪裳如霧集車騎若雲屯
兆庶皆翹首巍巍萬乘尊

升坐隆安 禋祀畢圓丘嘉辰慶澤流天儀臨觀魏盛

禮藹風猷洋溢歡聲動氛氲瑞氣浮上穹垂眷佑邦
國擁鴻休

降坐隆安 華纓就列左衽來王帝儀炳煥大樂鏗鏘
禮成嶢闕言旋未央一人有慶萬壽無疆

咸平御樓四首

采茨 禮成于郊迎日之至時乘六龍天旋象魏端門
九重虎賁萬騎四夷來王羣后輯瑞

索扇隆安 應門有翼羽衛斯陳山龍袞冕律度聲身

我我奉璋肅肅九賓清明在躬志氣如神

升坐隆安 圓丘類上帝六變降天神禋燔禮云畢仗
衛肅以陳天顏瞻咫尺王澤熙陽春玉帛臻禹會動
植霑堯仁

降坐隆安 肆眚云畢淳熙溥將雷雨麗澤雲物效祥
禮容濟濟天威皇皇大賚四海富壽無疆

咸平籍田回仗御樓二首

采茨 農皇既祀禮畢躬耕商輅旋軫周頌騰聲觀魏

將陟服御爰更輿人瞻仰如日之明

升坐隆安 應門斯御雉扇爰開人瞻日月澤動雲雷
同風三代均禧九垓歡心允洽時詠康哉

乾興御樓二首

升坐隆安 夾鍾紀月初吉在辰青災流慶有德推仁
采章震耀典禮具陳茂昭丕貺永庇斯民

降坐隆安 皇衢赫敞黼坐穹崇華纓在列嚴令發中
王制鉅麗寶瑞豐融均禧絲寓萬壽無窮

紹興登門肆赦二首

升坐乾安 拜況于郊皇哉唐哉熙事休成六駢鼎來
天閩以決地垠以開隕祉發祥如登春臺

降坐乾安 鴻霈普洽言歸端門蕩蕩巍巍旋乾轉坤
穆然宣室儲思垂恩於萬斯年敷錫羣元

寧宗登門肆赦二首

升坐乾安 帝饗于郊荷天之休五福敷錫皇明燭幽
雲行雨施仁翔德游聖人多男歌頌九州

降坐乾安 天日清晏朝野靖安三靈答祉萬國騰懽
帝命不違王業艱難天子萬年永迪監觀

皇帝上尊號一首

冊寶入門正安 於穆元后天臨紫宸飛綉星拱建羽
林芬徽冊是奉鴻名愈新荷茲介祉永永無垠

明道元年章獻明肅皇太后朝會十五首

皇太后升坐聖安 聖母有子重光類禋聖皇事母感
極天人百辟在庭九儀具陳禮容之盛萬國咸賓

公卿入門禮安 帝率四海承顏盡恭端
闡肅設羣后 來同玉佩鏘鳴衣冠有容英韶節步磬管雍雍

皇帝上壽酒崇安 天子之德形于四方尊親立愛化

洽風揚聖母禕衣明君黼裳因時獻壽克盛朝章

上壽福安 盛禮煌煌六衣有光千官在位百福稱觴
乾德慈仁邦斯淑祥如山之壽佑聖無疆

皇太后初舉酒玉芝 熒熒靈芝生于殿闈照映華拱
紛敷玉蕤感召元和光符聖期祥篇協吉百福咸宜

再舉酒壽星 現彼南極昭然瑞文騰光丙位薦壽中

宸太史駢奏升歌有聞軒宮就養億萬斯春

三舉酒奇木連理 王化無外坤珍效靈旁枝內附直

幹來并羣分非一祺祥紹登至誠攸感海縣斯寧

羣臣酒行禮安 肅肅臨下有威有容循循事上惟信

惟忠盛禮興樂示慈訓恭君臣協吉惟道之從

湛湛零露晞于載陽我有旨酒羣臣樂康既飲以德

亦圖爾良永言修輔用協天常

禮均孝慈樂合韶武至德光矣鴻恩亦溥上下和濟
華夷樂滑醜竽三行盛儀斯舉

酒一行畢作厚德無疆之舞 堯母之聖放勛為子同
心協謀柔遠能邇以德康俗以文興治斯焉象功罔
不昭濟

至矣坤元道符惟聖就養宸極助隆善政翟籥紛舉
笙鏞協應翱翔有容表德之盛

酒再行四海會同之舞 七德之舞四朝用康有如姬

如助集周邦威克厥愛居安不忘風旋山立濟濟皇
皇

左秉朱干右揮玉戚以象武綴以明皇德天子榮養
羣臣述職四夷賓附罔不承式

降坐聖安 長樂居尊盛容有煒文王事親萬國歸美
朝會之則邦家之紀受福于天克昭隆禮

治平皇太后皇后冊寶三首

皇帝升坐乾安 王化之始治絲內孚時庸作命玉簡

金書磬筦在庭其縱繹如天臨法宸禮與誠俱

太尉等奉冊寶入門正安 晬儀臨拱丕命明敷鸞回

寶勢鴻貫瑤光禮成樂備德裕名芳肇基王化永懋
天祥

皇帝降坐乾安 袞衣繡裳嚴威肅莊八音具張箕虞

龍驤玉簡瑤章金書煌煌壽千萬年與天比長

熙寧皇太后冊寶三首

出入正安 煌煌鳳字玉氣宛延天門崛岉飛驂後先

龍翼四合奏鼓淵淵母儀天下何千萬年

升坐乾安 峩峩綉宸旋佩以登如彼杲日凌天而升

玉色下照疊疊繩繩猗歟大孝四海其承

降坐乾安 皇帝降席流雲四開堯趨舜步下躡天堦

恭授寶冊翠旌裴回明明純孝鴻釐大來

哲宗上太皇太后冊寶五首

皇帝升坐乾安 大矣孝熙帥民以躬奉承寶冊欽明

兩宮萬樂具舉一人肅雍化繇上始四海來同

降坐乾安 皇帝仁孝總臨萬方褒顯其親日嚴以莊
龍袞翼翼玉書煌煌傳之億世休有烈光

太皇太后升坐乾安 總裁庶政擁佑嗣皇金書玉簡

爛其文章衆歌警言作筦磬將將保安四極降福無疆
降坐乾安 塗山之德渭渙之祥圖徽寶冊玉色金相
管弦燈煗鐘鼓喤喤天之所啓既壽而昌

太尉等奉冊寶出入門正安 玉車臨御鳳蓋琴麗奉
承寶冊彌文盛儀抗聲極律助我孝熙天之所佑萬

壽無期

紹興十一年發皇太后冊寶八首

皇帝隨冊寶降殿聖安 景祚有開符天媿昊誕毓聖

神是崇位號星拱天隨祗嚴冊寶還御慈寧增光舜

道

中書令奉冊詣皇帝褥位禮安 聲樂備陳禮容罔忒

相維辟公虔奉玉冊皇則受之慕形於色既壽且康

與天無極

侍中奉寶詣皇帝褥位禮安 祖啓瑤光誕生明聖尊
極母儀帝康作命寶章煌煌導以笙磬還燕慈寧邦
家僖慶

太傅奉冊寶出門聖安 肅肅東朝帝隆孝治猗歟丕
稱寶冊斯備皇扉四闕導迎慶瑞德邁大任有周卜
世

太傅奉冊寶入門聖安 靜順坤儀聖神是育懿鑠昭
陳鏤文華玉樂奏既備禮儀不瀆導迎善祥翟車歸

冕

太傅奉冊授提點官禮安 孝奉天儀信維休德發越

徽音禮文靡忒永保嘉祥時萬時億歸于東朝含飴

燕息

太傅奉冊授提點官禮安 肅雍長樂克篤其慶河洲

茂德沙麓啓聖是生睿哲蚤隆丕運欽稱鴻寶永膺

天命

冊寶升慈寧殿幄聖安 禮行東朝樂奏大呂羽衛森

陳簪紳式序雲幄邃嚴宏典是舉天子萬年母儀寰
宇

乾道七年恭上太上皇帝太上皇后尊號十一首

冊寶降殿正安 元祀介福孰綏孰將歸于尊親孝哉
君王載鏤斯牒載琢斯章得名得壽如虞如唐

中書令侍中奉冊寶詣殿下正安 宗郊斯成交舉典

冊汝輔汝弼威儀是力陳于廣庭迨此上日巍巍煌
煌烏覩在昔

皇帝奉太上皇帝冊寶授太傅用禮安

奉太上
皇后同

儀物

陳矣禮樂明矣天子戾止詒爾臣矣陟降維則恭且
勤矣茫茫四海德教形矣

冊寶出門正安 天門九重蕩蕩開徹金支秀華垂紳
佩玦或導或陪率履不越注民耳目四表胥悅

冊寶入德壽宮門正安 禮神頌祇福祿來下不有榮
名孰緝伊嘏千乘萬騎魚魚雅雅皇扉洞開鞠躬如
也

太上皇帝升御坐

降同

穆穆聖顏安安天步有縟者儀

以莫不舉天人和同恩澤洋普億載萬年為衆父父

太傅奉太上皇帝冊寶升殿用聖安

大哉堯乎南嚮

垂裳君哉舜也拜而奉觴繅藉光華鼓鐘鏘鏘三事

稽首宋德無疆

太傅奉上皇后冊寶升殿用聖安

乾元資始坤元資

生允也聖德同實異名春王三朝典冊並行咨爾上

公相儀以登

皇帝從太上皇后冊寶詣宮中用正安 維冊伊何鏤

玉垂鴻維寶伊何範金鈕龍翊以執御間以筮鏞誰
敢不恭天子實從

太上皇后出閣升御坐坤安

降同

帝膺永福功靡專有

既尊聖父亦燕壽母怡怡在宮大典時受彤管紀之
天長地久

內侍官舉太上皇后冊詣讀冊位用聖安 歛福于郊

逢時之泰揭名日月侔德覆載自我作古域中有大

永言保之眉壽無害

淳熙二年發太上皇帝太上皇后冊寶十一首

冊寶降殿正安 高明者乾博厚者坤以清以寧資始
資生壽胡可度德胡可評願言從欲誕受強名

中書令侍中奉冊寶詣殿下正安 受命既長福祿既
康如日之升如月之常追琢其章金玉其相君子萬
年保其家邦

皇帝奉太上皇帝冊寶授太傅禮安

奉太上
皇后同

翠華之

旗靈鼉之鼓陳于廣宇相我盛舉來汝公傅肅乃儀
矩母愆于素以篤多祐

冊寶出門正安 蚺繆青龍婉嬋象輿其載伊何煌煌
金書乃由端門乃行康衢于以榮親振古所無

冊寶入德壽宮門正安 惟天為大其德曰誠惟堯則
之其性曰仁迺文迺武得壽得名於萬斯年以莫不
增

太上皇帝升御坐乾安降同 天行惟健天步惟安聖子

中立臣工四環民無能名威不違顏宋德宜頌漢儀
可刪

太傅奉太上皇帝冊升殿聖安

奉寶同

天畀遐福允彰

父慈維昔曠典我能舉之徐爾陟降敬爾威儀申錫
無疆永言保之

太傅奉太上皇后冊寶升殿聖安 乾健坤從陽剛陰

相迨茲受祉允也並況虞業在下儀物在上咨時三
公執事無曠

皇帝從太上皇后冊寶詣宮中用正安 丕顯文王之
德之純亦有太妣式揚徽音維冊維寶廼玉廼金伊
誰從之一人事親

太上皇后出閣升御坐坤安

降同

重翟出房褱衣被躬

委委佗佗河潤山容聖皇臨軒聖母在宮並受鴻名
與天無窮

內侍官舉太上皇后冊詣讀冊位用聖安

舉寶同

珉玉

玠幽裏蹄精良既刻厥文亦鑄之章象德維何至靜

而方輔我光堯萬壽無疆

淳熙十二年加上太上皇帝太上皇后尊號十一首

大慶殿發冊寶降殿正安 維天蓋高維地克承父尊

母親天地難名疆名廣大建號安榮衍登壽域闡繹

皇明

中書令侍中奉太上皇帝冊寶太上皇后冊寶詣殿下

用正安 二儀同尊兩耀齊光巍巍煌煌丕顯亦彰寶

茂號榮玉振金相於萬斯年既壽且昌

皇帝奉太上皇帝冊寶授太傅

太上皇后冊寶同

我尊我親

承天之祉壽名兼美家國咸喜公傅秉禮寶冊有煒

惟千萬祀令聞不已

冊寶出門正安 羽衛有嚴寶書有輝昭衍尊名鋪張

上儀出其端闡由于康逵比屋延瞻歌之舞之

德壽宮冊寶入殿門正安 南山之鞏皇壽無窮太極

之尊皇名是崇奉茲寶冊于皇之宮皇則受之於昭

盛容

太上皇帝出宮升御坐乾安

降坐同

聖明太上天子有

尊玉坐高拱慈顏睟溫震禁嘉承朝弁昉分盛禮縟
典邃古未聞

太傅中書令侍中奉太上皇帝冊寶升殿用聖安 天

錫伊嘏地效其珍誕作寶典奉于尊親爾公爾相爾
恭爾寅協舉令儀適臻厥成

太傅中書令侍中奉太上皇后冊寶升殿用聖安 坤

載有元乾行是順施生萬彙厥德彌盛翼翼母道贊

我皇訓相維羣公奉典斯敬

皇帝從太上皇后冊寶詣宮中用正安 大矣母慈德
備且純思古齊敬佐我皇文明章茂典金玉其音帝
親奉之以翼以欽

太上皇后出閣升御坐用坤安


降坐同

天相慈皇慶臻

壺闈徽柔內修壽與天齊既承皇歡載覲母儀懿典
鴻名永綏多祺

內侍舉太上皇后冊寶詣讀冊寶位用聖安 有美英

瑤於昭祥金為策為章並著徽音德聖而尊備舉彌
文億載萬年永輔堯勛



宋史卷一百三十八

欽定四庫全書

史部

宋史卷一百

三十九
四十

詳校官編修臣邱庭滢

洗馬臣王坦修覆勘

覆校官編修臣沈清藻

校對官監丞臣侍朝

騰錄貢生臣李玉瓚

欽定四庫全書

宋史卷一百三十九

元中書右丞相總裁托克托等修

樂志第九十二

樂十四樂五八

恭上皇高皇太后尊號下

冊皇太子皇子冠

冊立皇后
鄉飲酒

閨喜宴
鹿鳴宴

紹熙元年恭上壽聖皇太后至尊壽聖皇帝壽成皇后

尊號冊寶十四首

大慶殿發冊寶降殿正安 帝受內禪紀元紹熙欽崇
慈親孝心肅祇廼建顯號廼嚴丕儀發冊廣庭聲歌
侑之

中書令侍中奉三宮冊寶詣東階下用禮安 鐘鼓交
作文物咸備彤庭玉階天子是莅咨爾輔臣展采錯
事輔臣稽首敢不率禮

冊寶出門正安 巍巍天宮洞開闔闔旗常歲蕤劔佩

雜沓寶冊啓行法駕繼發鏢哉盛典快覩胥悅

冊寶入重華宮正安 仰止皇居九門載闢麗日重光

非烟五色雷動萬乘雲從百辟咫尺重霄鞠躬屏息

至尊壽聖皇帝升坐乾安

降同

玉璽瑤編禮容畢具穆

穆至尊華殿是御德配有虞紹唐授禹於萬斯年受
天之祐

太傅中書令奉至尊壽聖皇帝冊升殿用聖安 慈皇

天臨睟表怡怡欽哉聖子親奉玉卮鼇抃嵩呼歡浹

華夷邇臣捧冊是恪是祗

太傅侍中奉至尊壽聖皇帝寶升殿用聖安 瑟彼華

玉篆魚鈕龍與冊並登咨爾上公詠以歌詩協之鼓

鐘是陟是降靡有弗恭

太傅中書令侍中奉壽聖皇太后冊寶升殿用聖安

天祐皇家慶集重闈寶兮揚名冊兮流徽金支秀華

盛容稜威詔我近弼相禮不違

太傅中書令侍中奉壽成皇后冊寶升殿用聖安 大

哉乾元既極形容坤元德至實與比隆寶冊並登勒
崇垂鴻相我縟儀肅肅雍雍

皇帝從聖壽皇太后冊寶詣慈福宮用正安 涓辰協
吉時維春元上冊三殿曠古無前思齊重闡積慶有
源是尊是崇帝心載虔

壽聖皇太后出閣升坐坤安降同 丕赫有宋三聖授受

誰其助之繫我太母東朝受冊飲此春酒聖子神孫
密侍左右

內侍官舉壽聖皇太后冊寶詣讀冊寶位用聖安 坤

德益崇天壽平格慶流萬世子孫千億刻玉範金鋪

張赫奕惟昔姜任則莫我匹

皇帝詣壽成殿壽成皇后出閣升坐坤安

降同

鞠育保

護母道備矣密贊親傅德其至矣綵服來朝慈容有

喜既受鴻名又多受祉

內侍官舉壽成皇后冊寶詣讀冊寶位用聖安 仰瞻

慈闈登進寶冊惟時摯御祗率厥職曰壽曰名母兮

兼得儷我尊父億載無極

紹熙四年加上壽聖皇太后尊號八首

大慶殿發冊寶降殿正安 德厚重闡冲澹粹穆何以
名之惟慈惟福寶鏤精鏐冊鐫華玉物盛禮崇丕昭
羣目

中書令侍中奉壽聖皇太后冊寶詣東階下禮安 於
皇帝室休運貽孫重熙疊慶祇進號榮爰授茲冊必
躬必親天子聖孝萬邦儀刑

冊寶出門正安 煌煌冊寶天子受之言徐其行肅展
迺儀其儀維何劔佩黃麾鸞駕清蹕聳瞻九達

冊寶入慈福宮殿門正安 熙辰禮備濟濟雍雍言奉
斯冊重親之宮宮惟既敬協氣感通皇儀親展壽祉
無窮

太傅中書令侍中奉壽聖皇太后冊寶升殿聖安 既
肅琨庭載升金祀迺導迺陪威儀濟濟天步繼臨孝
誠備矣聲容孔昭中外悅喜

冊寶詣宮中正安 琯輿彩仗祇詣慈宮寶冊前奉龍
挾雲從言備茲禮于宮之中惟天子孝於昭祲容

壽聖皇太后出閣升御坐坤安

降同

懿典大冊陳儀邃

深怡怡愉愉寶坐是臨重綵儼侍朶展肅心三宮協
慶永播徽音

內侍官舉壽聖皇太后冊寶詣讀冊寶位用聖安 寶

冊既奉祇誦廼言仁深慶衍益顯益尊和聲協氣充
溢乾坤並受伊嘏聖子神孫

慶元二年恭上太皇太后皇太后太上皇帝太上皇后
尊號二十四首

冊寶降殿 天擁帝家澤流子孫三宮燕胥四海崇尊
聲詣韶濩輝燭瑤琨維皇緝熙耀德乾坤

冊寶授太傅奉詣東階下 祖后重壽親闈並崇駢慶
聯休申景鋪鴻疊璧交輝多儀煥叢億萬斯年福祿
攸同

冊寶出門 太任媚姜塗山翼禹慈祥曼衍鴻儀迭舉

寶章奕奕祿宮侯侯帝用將之于彼宮所

慈福宮寶冊入門 東朝層邃端闈靖深列仗節鑾鏤

玉繩金來奉來崇載祇載欽曾孫之慶世世徽音

冊寶升殿 純佑我宋母儀四朝擁翼孫謀如虞承堯

仁覃函夏喜浮慶霄福祿萬年金玉孔昭

冊寶詣宮中 神人和懌天日淑清王母來燕必壽而

名琨庭璫音五雲佩聲勉勉我皇適昭厥成

太皇太后出閣升坐 曾孫致養五福駢臻太極所運

兩儀三辰輝光日新啓佑後人永翼瑤圖億萬堯春
冊寶詣讀冊寶位 徽光宣華仁聲流文曠儀合沓泰
和綢緼慈顏有喜祚我聖君珠宮含飴坐閱來雲

太皇太后降坐歸閣 縟儀既登寶冊既膺喜洽祥流
雲烝川增天子萬年鳴玉慈庭惠我無疆詵詵繩繩
壽慈宮冊寶入門 新庭靖安祖后燕怡有開聖謀累
崇天基典章文明聲容葳蕤御于邦家曰壽曰慈

冊寶升殿 三禮崇容八鑿警衛有來辰儀闡徽媯汭

璇宮肅雍藻景澄霽文子文孫本支百世

冊寶詣宮門 堯門疊瑞妣幄齊輝重坤靖夷麗冊華

徽天子仁聖禮文弗違福壽康寧同燕層闈

皇太后出閣升坐 文母曼壽載錫之光總集瑞命宜

君宜王惠以仁顯慈以德彰保佑子孫受福無疆

冊寶詣讀冊寶位 華鸞編玉文螭液金頌德搞英揚

徽嗣音紫幄天開翠華日臨歲歲年年如周大任

皇太后降坐歸閣 宋有明德天保佑之以壽繼壽以

慈廣慈聲文宣昭福祉茂綏神孫之休燕及華夷

壽康宮冊寶入門正安 大安耽耽興慶崇崇維皇之

尊與天比隆非心閒燕文命延鴻欲報之恩禮縟儀

豐

太上皇帝升御坐乾安 上帝有赫百靈效祥儲祉垂

恩錫年降康皇儀睟溫帝躬肅莊三宮齊懽地久天

長

太上皇帝冊寶升殿聖安 夏典稽瑞禹玉含淳追琢

有章溫潤孔純聖底于安壽綿於仁太上立德自天
其申

太上皇后冊寶升殿聖安 父尊母親天涵地育燕我
翼子景命有僕得名得壽如金如玉子孫千億成其
厚福

太上皇帝降御坐乾安 天地清寧日月華光歸尊慈
極嵩呼未央慶涵百嘉壽躋八荒上皇萬歲俾熾俾

昌

冊寶詣宮中正安 晨趨慈幄佳氣鬱葱受帝之祉配
天其崇璧華金精禮敷樂充天子是若懽聲融融

太上皇后出閣升坐坤安 文物流彩鑿輅靖陳龜瑞
薦祉坤儀效珍比皇之壽翼帝以仁和氣致祥與物
為春

讀冊寶聖安 黼黻其文金玉其相永壽於萬合德無
疆福緒祥源厥後克昌天維格斯祚我聖皇

太上皇后降坐歸閣坤安 榮懷之慶莫盛於斯三宮

四冊五葉一時德阜而豐福大而滋子子孫孫于時
保之

嘉泰二年恭上太皇太后尊號八首

冊寶降殿 思齊太任嬪于周京至哉坤元萬物資生
不可儀測矧可強名鏤玉繩金昭哉號榮

冊寶詣東階 鼓鐘喤喤儀物載陳儀物陳矣爛其瑤
琨咨爾上公相予文孫勿亟勿徐奉我重親

冊寶出門 蕩蕩天門金鋪玉戶采旄翠旌流蘇葆羽

千官影從迺導迺輔都人縱觀填道呼舞

壽慈宮冊寶入門 煌煌寶書玉篆金鏤曷為來哉自

天子所自天子所以燕文母婉嬗祥雲日正當午

冊寶升殿 文物備矣三事其承崇牙高張樂充宮庭
耽耽廣殿左城右平敬爾威儀攝齊以登

冊寶詣宮中 維壽伊何聖德日新維慈伊何祐于後
人迺范斯金迺鏤斯珉皇舉玉趾從于堯門

太皇太后升御坐降同 侍中版奏辨外嚴中出自玉房

禕榆被躬我龍受之稜威盛容皇帝聖孝其樂融融
冊寶詣讀冊寶位 麟趾裏蹄我寶斯刻硬礮采綴載
備斯冊眉壽萬年詒謀燕翼於赫湯孫克綿永福

紹定三年壽明仁福慈睿皇太后冊寶九首

文德殿冊寶降殿 思齊聖母媿于周任體乾履坤博
厚洪深七表既啓萬壽自今昕庭發號式昭德音

冊寶詣東階 煌煌儀物繹繹鼓鍾奉茲寶冊至于階
東上公相儀列辟盡恭拜手慈宸福如華嵩

冊寶出門 帝闕肅開天階坦履霓旌羽蓋導儀護衛
匪誇雕琢匪矜繁麗茲謂盛儀億載千歲

慈明殿冊寶入門 金堅玉純文郁禮縟來從帝所作

瑞王國天開地闢日熙春煥茲謂盛事永燕弗祿

冊寶升殿 皇儀有煒綵畀次升沈沈邃殿穆穆天廷

坤德深隆皇圖永寧咨爾廷臣攝齊以登

冊寶詣宮中 壽為福先明燭物表仁沾動植福齊穹

昊曰慈與睿並崇丕號演而申之萬世永保

皇太后升御坐 邇臣跪奏嚴辨必恭乃御禕榆升于
殿中慈顏雍穆和氣沖融芳流清史傳之無窮

冊寶詣讀冊寶位 徽音孔昭寶傳斯刻金昭玉粹有
燧斯冊載祈載祝以燕以翼寶之萬年與宋無極

皇太后降御坐 皇文既舉慶禮告虔肇自宮闈格于
幅員子稱母壽母謂子賢陟降在茲隆名際天

哲宗發皇后冊寶三首

皇帝升坐乾安 既登乃依如日之升有嚴有翼丕顯

丕承天作之合家邦其興朱芾斯皇子孫繩繩

降坐乾安 我禮嘉成我駕言旋降坐而蹕奏鼓淵淵

景命有僕保佑自天永錫祚嗣何千萬年

太尉等奉冊寶出入正安 宣哲維公就位肅莊冊寶

具舉丕顯其光出于宸闈鼓鐘嗶嗶母儀天下萬壽

無疆

紹興十三年發皇后冊寶十三首

皇帝升坐乾安 天地奠位乾坤以分夫婦有別父子

相親聖王之治禮重婚姻端冕從事是正大倫

使副入門正安 天子當陽羣工就列冊寶既陳鐘鼓

備設上公奉事容莊心協克相盛禮光昭玉牒

冊寶出門正安 穆穆眸容如天之臨赫赫明令如玉

之音虔恭出門禮容兢兢塗山生啓夏道以興

皇帝降坐乾安 朝陽已升薰風習至樂奏既成禮容

亦備玉佩鏘鳴帝徐舉趾壺政穆宜以聽內治

皇后出閣坤安 猗歟賢后德本性成承天致順遡日

為明作配儷極王化以行萬有千歲奉祀宗祊

冊寶入門宜安 欵承祗事時惟肅雍跪奉冊寶陳于

法宮以俯以仰有儀有容明神介之福祿來崇

皇后降殿承安 溫惠之德禕翟之衣行中采薺禮無

或違降于丹陛有容有儀委蛇蛇誰其似之

皇后受冊寶成安 鏤蒼玉兮盛德載揚鑄南金兮作

鎮椒房虔受賜兮有燧有光宜室家兮朱芾斯皇

皇后升坐和安 禮既行兮厥位孔安母儀正兮容止

所觀奉東朝兮常得其歡求淑女兮豈樂多般

內命婦入門惠安 素月澄輝衆星顯列炳為天文各

有攸別椒房既正陰教斯設闕睢麟趾應如響捷

外命婦入門咸安 窈窕其容淑嫵其姿爛其如雲瞻

我母儀曰天之妹作合惟宜粲然舞抃疇不肅祇

皇后降坐徽安 寶字煌煌冊書粲粲副笄加飾禕綸

有爛祗若帝休委蛇樂衍億萬斯年永膺宸翰

皇后歸閣泰安 太任徽音太姒是嗣則百斯男周室

以熾天子萬年受茲女士如嬖事任從以孫子

淳熙三年發皇后冊寶十三首

皇帝升坐乾安 赫赫惟皇如日之光肅肅惟后如月

之常禮行一時明照無疆天子益止疇敢不莊

冊寶入門正安 卜月惟良練辰斯臧臣工在庭劔佩

瑲瑲來汝凝丞明命是將有淑其儀無安怠遑

冊寶出門正安 刻簡以珉鑄寶以金持節伊誰時惟

四鄰自我文德達之穆清委蛇委蛇往迄于成

皇帝降坐乾安 冊行何鄉于門東偏禮備樂成合扇
鳴鞭皇舉玉趾如天之旋燕及家邦億萬斯年

皇后出閣坤安 椒塗蘭馭河潤山容副笄在首禕衣
被躬靜女其姝實翼翼從自彼西閣聿來殿中

冊寶入門宜安 德隆位尊禮厚文縟乃篆斯金乃鏤
斯玉羣公盈門執事有肅願言保之永鎮坤軸

皇后降殿承安 規殿沉沉吐氣收收明章婦順表正
人倫躡是左城暨于中庭尚宮顯相罔有弗欽

皇后受冊寶成安 備物典冊樂之鼓鐘拜而受之極

其肅雍司言司寶各以職從行地有慶與天無窮

皇后升坐和安 容典既膺壺儀既正羽衛外列揚顏

中映如帝如天以莊以靚六宮承式二南流詠

內命婦入門惠安 葛覃節用樛木逮下形為嬪則夙

已心化茲臨長秋遂正諸夏以慶以祈百祥來迓

外命婦入內咸安 碩人其碩公侯之妻翟芾以朝象

服是宜如星之拱朔月之輝母儀既瞻羣心則夷

皇后降坐徽安 窈窕淑女備六服兮陟降多儀聳羣
目兮內治允備陰教肅兮宜君宜王綏有福兮

皇后歸門泰安 天監有周是生太任亦有太姒嗣其
徽音孰如兩宮慈愛相承思齊之盛復見于今

淳熙十六年皇后冊寶十三首

皇帝升坐乾安 乾位既正坤斯順承日麗于天月斯
朔明惟帝受命惟帝並登黼宸尊臨典冊是行

冊寶入門正安 迺協良辰維春之宜迺詔近弼來汝

相儀九門洞開文物華輝聲詩載歌于以侑之

冊寶入門正安 有璽範金有冊鏤瓊汝使汝介持節
以行禮始文德達于穆清是恪是虔依我和聲

皇帝降坐乾安 鼓鐘喤喤磬筦鏘鏘劔佩充庭濟濟
洋洋禮典告備皇心樂康於萬斯年受福無疆

穆清殿受冊寶皇后出閣坤安 懿範柔容如月斯輝
駕厥翟輅被以禕衣九御從之如雲祁祁典冊是承
心焉肅祗

冊寶入門宜安 華棖璧璫有馨椒殿備物來陳多儀
式煥曰冊曰寶是刻是琢並舉以行皇矣懿典

皇后降殿承安 禕褕盛服有恪其容是陟是降相以
尚宮金殿玉階聿來于中展詩應律載詠肅雍

皇后受冊寶成安 帝有顯命稟于親慈后德克承拜
而受之人倫既正王化是基億載萬年永祚坤儀

皇后升坐和安 帝慶三宮膺受寶冊御于中闈載欣
載惕廼敷陰教廼明內則翼翼魚貫罔不承式

內命婦入門惠安 掖庭頒宮于位有四嘒彼小星撫
以德惠熙焉如春育焉如地慶禮聿成靡弗咸喜

外命婦入門咸安 魚軒鼎來象服是宜班于內庭率
禮惟祇化以婦道時惟母儀是慶是類于胥樂兮

皇后降坐徽安 正位長秋容典備矣王假有家人倫
至矣儷極倪天多受祉矣蟄蟄螽斯宜孫子矣

皇后歸閣泰安 維天佑宋盛事相仍崇號三宮甫茲
浹辰肇正中闡縟禮載陳邦家之慶曠古無倫

皇帝升坐乾安 乾健坤順羣生首資日常月升四時
叶熙帝嗣天歷后崇母儀黼黻承暉王化是基

使副入門正安 燁闕壇蛸壁門雲龍烈文維輔翊奉
有容典章輝明彞度肅雍歲時縟儀登于璿宮

冊寶出門正安 金晶麗輝壁葉含春贊夏之翼繹虞
之嬪樂序韶亮禮文藻新辟公相成物采彬彬

皇帝降坐乾安 帝旒雲舒金秀充庭璇衛鑿華菁佩
垂經皇容熙備柔儀順承三宮齊懽萬福昭膺

皇后出閣坤安 驂翟崇容禕鞠陳衣戾止蘭殿夙興

椒闈淑正宣華粹明騰輝欽若有承嗣音之徽

冊寶入門宜安 禕帟流光慶祥增衍編玉鏤德螭金

溢篆粹猷藻黻徽文華顯二南聲詩于時昭闡

皇后降殿永安 鞏珩煥采趨節風韶陟降城陞奉將

英瑤辟道承薰嬪儀揚翹是敬是祇德音孔昭

皇后受冊寶成安 帝奉太室后儀成之帝養三宮后

志承之德如關雎盛如螽斯宜君宜王百世本支

皇后升坐和安 肅肅壺彝雍雍陰教險詖自防警戒
是微中闈端委列御胥告其思輔順永翼帝孝

內命婦入門惠安 天子九嬪王宮六寢有熀令儀載
秩華品福履綏將節用躬儉矢其德音于以來諗

外命婦入門咸安 象服之文鵲巢之風化以婦道覲
于內宮采蘋澗濱采藻澗中夙夜在公贊彼累功

皇后降坐徽安 光佑晏寧惠慈燕喜壽仁並崇家邦
均祉懿文交舉壺冊嗣美維億萬年愛敬惟似

皇后歸閣泰安 天心仁佑坤德世昭灼有慈範著于
累朝儉以贊虞勤以承堯是用則倣共勵夙宵

嘉泰三年皇后冊寶十三首

皇帝升坐乾安 茂建坤極容典聿新天命所贊慈訓
是遵肅涓穀旦躬御紫宸鴻禧累福駢賚翕臻

使副入門正安 端門曉闢瑞氣雲凝有儼良輔踵武
造廷肅肅王命是將是承登冊穆清萬歲永膺

冊寶出門正安 瑤冊玉寶爛然瑞輝旁翼絳節上承

紫微璆鳴朝佩徐出獸扉登進坤極益彰典徽

皇帝降坐乾安 天臨黼宸雲集弁纓金石遞奏典禮

備成玉趾緩步龍駕翼行言旋北極永燕西清

皇后出閣坤安 日薰椒屋雲靄璧門有華瑞節來自

帝閣統天惟乾合德者坤我龍受之福祿永繁

冊寶入門宜安 虹輝燦爛雲篆綢繆絳節前導瑞光

上浮瑤階玉扉既集長秋欽承天寵永荷帝休

皇后降殿永安 瑤殿清閔玉城坦夷禕衣副珈陟降

不遲寶冊聿至載肅載祇禮儀昭備福履永綏

皇后受冊寶成安 日月臨燭乾坤覆持明並二曜德

合兩儀光婉宸極共恢化基膺受茂典億載永宜

皇后升坐和安 寶璽瑤冊既祇既承繡裯藻席載躋
載升柔儀肅穆瑞命端凝永膺多福如川方增

內命婦入門惠安 服煥盛儀班分華綴九嬪婦職六
寢內治參差苻菜求勤寤寐烝然來思相禮贊祭

外命婦入門咸安 婦榮於室通籍禁中班列有次車

服有容佐我闕雉鵲巢之風被之僮僮曷不肅雍

皇后降坐徽安 金石具舉典禮茂明淑慎其止適觀

厥成瓊琚微動鳳輦翼行儀光媿極德邁嬪京

皇后歸閣泰安 寶坐既興鳳輿戒行奏解嚴辦歸燕

邃清問安壽慈奉齋宗祊彌千萬年內助聖明

嘉定十五年皇帝爰膺天命之寶三首

恭膺天命之曲太簇宮 我祖受命恭膺于天爰作玉

寶載祗載虔申錫無疆神聖有傳昭茲興運於萬斯

年

舊疆來歸之曲太簇宮 於穆我皇之德之純涵濡羣

生矧我遺民連齊跨晉輸貢效珍土宇日闢一視同

仁

永清四海之曲太簇宮 我祖我宗德厚澤深於皇繼

序益單厥心天人協扶一統有臨乾坤清夷振古斯

今

至道元年冊皇太子二首

太子出入正安 主鬯之重允屬賢明承華肇啓上嗣
騰英禮脩樂舉育德開榮一人元良萬邦以寧

羣臣稱賀正安 皇儲既建聖祚無疆鸞旌列叙鷄戟
分行前星有爛瑞日重光際天接聖溫文允臧

天禧三年冊皇太子一首

太子出入明安 明離之象少陽之位固邦為本體天
作貳儀範堯溫禮章斯備丕宣令猷恭守宗器

乾道元年冊皇太子四首

皇帝升坐乾安 宋受天命聖緒無疆惟懷永圖乃登

元良涓選休辰冊書是將黼坐天臨穆穆皇皇

太子入門明安 於維皇儲玉潤金聲體震之游重離

之明冊寶具舉環佩鏘鳴守器承祧惟邦之榮

太子出門明安 樂備既奏和聲沖融玉簡金書翔鸞

戲鴻下拜登受旋于青宮儀辰作貳垂休無窮

皇帝降坐乾安 我禮備成我駕言旋降坐而蹕奏鼓

淵淵國本既定保佑自天克昌厥後何千萬年

乾道七年冊皇太子四首

皇帝升坐乾安 建儲以賢闢宮于東典策既備筮占

既從濟濟卿士鏘鏘鼓鐘天子戾止盛哉禮容

太子入門明安 琯珉瑳瑳篆金煌煌對揚于庭是承

是將星重其輝日重其光觀瞻以懌國有元良

太子出門明安 淵中象德玉裕凝姿進退周旋有肅

其儀既定國本益隆慶基燕及兩宮福祿如茨

皇帝降坐乾安 儲副豫定器之公兮冊受孔時禮之

隆兮天步遲遲旋九重兮壽祉萬年德無窮兮

嘉定二年冊皇太子四首

皇帝升坐 於皇我宋受命于天升儲主鬯衍慶卜年

典冊告備庭工載虔萬乘涖止端冕邃延

太子入門受冊寶 太極端御少陽肅祇珉簡斯鏤袞
服孔宜式奏備樂迺陳盛儀下拜登受永言保之

太子受冊寶出門 明兩承曜作貳宣猷茂德金昭令

譽川流豫定厥本永貽迺謀三朝致養問寢龍樓

皇帝降坐 震游體象我諸明兮
渙揚顯冊我禮成兮
大駕言旋警蹕鳴兮
燕祉無疆邦之榮兮

寶祐二年皇子冠二十首

皇帝將出文德殿隆安 於皇帝德乃聖乃神
奉支百世立愛惟親敬共冠事以明人倫
承天右序休命用申

賓贊入門祇安 豐芑詒謀建爾元子
揆禮儀年筮賓敬事八音克諧嘉賓至止
于以冠之成其福履

賓贊出門祇安 禮國之本冠禮之始賓升自西維賓
之位于著於阼維子之義厥惟欽哉敬以從事

皇帝降坐隆安 路寢闢門黼坐恭己羣公在庭所重
維禮正心齊家以燕翼子於萬斯年王心載喜

皇子初行 有來振振月重輪兮瑜玉在佩綦組明兮
左徵右羽德結旌兮步中采齊矩矱循兮

賓贊入門 我有嘉賓直大以方亦既至止厥德用光
冠而字之厥義孔彰表裏純備黃耆無疆

皇子詣受制位 吉圭休成其日南至天子有詔冠爾
皇嗣為國之本隆邦之禮拜而受之式共敬止

皇子升東階 茲惟阼階厥義有在歷階而升敬謹將
冠經訓昭昭邦儀粲粲正纚賓筵壽考未艾

皇子升筵 秩秩賓筵邊豆孔嘉帝子至止衿纓振華
周旋陟降禮行三加成人有德匪驕匪奢

初加 帝子惟賢懋昭厥德跪冠于房玄冠有特鼓鐘
皇皇威儀抑抑百禮既洽祚我王國

初醮 有賓在筵有尊在戶磬管將將醮禮時舉跪觴
祝辭以永燕譽寶祚萬年磐石鞏固

再冠 復及肇祥震維標德乃共皮弁其儀不忒體正
色齊維民之則璇霄眷佑國壽箕翼

再醮 冠醮之義匪酬匪酌于戶之西敬共以恪金石
相宣冠醮相錯帝祉之受施及家國

三加 善頌善禱三加彌尊爵弁綦綦介珪溫溫陽德
方長成德允存燕及君親厥祉孔蕃

三醮 席于賓階禮義以興受爵執爵多福以膺匪惟
服加德加愈升匪惟德加壽加愈增

皇子降 命服煌煌跬步中度慶輯皇闡化行海宇禮
具樂成惕若戒懼寶璐厥躬有秩斯祜

朝謁皇帝將出 皇王烝哉令聞不已燕翼有謀冠醮
有禮百僚在庭適相厥事頌聲所同嘉受帝祉

皇子再拜 青社分封前星啓燄繁弱綏章厥光莫揜
容稱其德蓄學之驗芳譽敷華大圭無玷

皇子退 玄袞黼裳垂徽永世勉勉成德是在元子昨
土南賓厥旨孔懿充一忠字作百無愧

皇帝降坐 愛始於親聖盡倫兮元子冠字邦禮成兮
天步舒徐皇心寧兮家人之吉億萬春兮

淳化鄉飲酒三十三章

鹿鳴呦呦命侶與儔宴樂嘉賓既獻且酌獻酌有序
休祉無疆展矣君子邦家之光

鹿鳴呦呦在彼中林宴樂嘉賓式昭德音德音惜惜

既樂且湛允矣君子實慰我心

鹿鳴呦呦在彼高岡宴樂嘉賓吹笙鼓簧幣帛粼粼
禮儀踟踟樂只君子利用賓王

鹿鳴相呼聚澤之蒲我樂嘉賓鼓瑟吹竽我命旨酒
以燕以娛何以贈之玄纁祭如

鹿鳴相邀聚場之苗我美嘉賓令名孔昭我命旨酒
以歌以謠何以置之大君之朝

鹿鳴相應聚山之荆我燕嘉賓鼓簧吹笙我命旨酒

以逢以迎何以薦之揚于王庭

右鹿鳴六章章八句

瞻彼南陔時物嘉良有泉清泚有蘭馨香晨飲是汲
夕膳是嘗慈顏未悅我心靡遑

嬉嬉南陔眷眷慈顏和氣怡色奉甘與鮮事親是宜
事君相思虔勗忠孝邦家之基

右南陔二章章八句

洋洋嘉魚侔以美眾君子有道嘉賓式燕以娛

洋洋嘉魚佇以芳罟君子有德嘉賓式歌且舞
我有宮沼龜龍擾之君子有禮嘉賓式貴表之
我有宮數麟鳳來思君子有樂嘉賓式慰勤思
相彼嘉魚爰縱之壑我有旨酒嘉賓式燕以樂
相彼嘉魚在漢之梁我有旨酒嘉賓式燕以康
森森喬木美蔓榮之我有旨酒嘉賓式燕宜之
啾啾黃鳥載飛載止我有旨酒嘉賓式燕且喜

右嘉魚八章章四句

崇邱莪莪動植斯屬高既自遂大亦自足和風斯扇
膏雨斯沐我仁如天以亭以育

崇邱巍巍動植其依高大之性各極爾宜王道坦坦
皇猷熙熙仁壽之域烝民允躋

右崇邱二章章八句

關雎于飛洲渚之湄自家刑國樂且有儀 郁郁芳
蘭幽人擷之温温恭人哲后求之 求之無斃寤寐
所屬罄爾一心受天百祿 郁郁芳蘭雨露滋之温

溫恭人圭組縻之 郁郁芳蘭佩服珍之 溫溫恭人
福履綏之 闕睢蹒蹒集水之央好求賢輔同揚德
光 蘋蘩芳滋同誰掇之願言賢德靡日不思 偶
其賢德輔成己職永配玉音服之無斁 潔其粢盛
中心匪寧薦於宗廟助君德馨 賢淑來思人之表
儀風化天下何樂如之

右關雎十章章四句

彼鵲成巢爾類攸處之子有歸瓊瑤是祖 彼鵲成

巢爾類有匹之子有行錦繡是飾 彼鵲成巢爾類
攸共之子有從蘭蓀是奉 伊鵲成巢珍禽戾止婉
彼佳人配于君子 伊鵲營巢珍禽攸處內助賢侯
弼于明主 伊鵲營巢珍禽輯睦均養嘉雛致于蕃
育

右鵲巢六章章四句

大觀聞喜宴六章

狀元以下入門正安 多士濟濟于彼西雍欽肅威儀

亦有斯容烝然來思自西自東天畀爾祿惟王其崇
初舉酒賓興賢能明明天子率由舊章思樂泮水光
于四方薄采其芹用賓于王我有好爵寘彼周行

再酌於樂辟雍樂只君子式燕又思服其命服攝以
威儀鐘鼓既設一朝疇之德音是茂邦家之基

三酌樂育英才聖謨洋洋綱紀四方烝我髦士觀國
之光遐不作人而邦其昌以燕天子萬壽無疆

四酌樂且有儀我求懿德烝然來思籩豆靜嘉式燕

綏之温温其恭莫不令儀追琢其章髦士攸宜

五酌正安 思皇多士揚于王庭鐘鼓樂之肅雝和鳴
威儀抑抑既安且寧天子萬壽永觀厥成

政和鹿鳴宴五首

初酌酒正安 思樂泮水承流辟雍思皇多士賁然來
從雝雝濟濟四方攸同登于天府維王是崇

再酌樂育人才 鐘鼓皇皇磬筦鏘鏘登降維時利用
賓王髦士攸宜邦家之光媚于天子事舉言揚

三酌賢賢好德 鳴鹿呦呦載弁俅俅烝然來思旨酒
思柔之子言邁泮渙爾游于彼西雍對揚王休

四酌烝我髦士 首善京師灼于四方烝我髦士金玉
其相飲酒樂曲吹笙鼓簧勉戒徒御觀國之光

五酌利用賓王 遐不作人天下喜樂何以况之鳶飛
魚躍既勸之駕獻酬交錯利用賓王縻以好爵

宋史卷一百三十九